

Presiden MIC kejutkan ramai, tolak dipilih semula pemegang amanah MIED
The Malaysian Insider
14 November , 2011
Oleh G. Manimaran

KUALA LUMPUR, 14 Nov — Dilihat sebagai tindakan mengejutkan banyak pihak dalam MIC, Presidennya Senator Datuk G. Palanivel mengambil keputusan saat-saat akhir menolak tawaran dipilih semula sebagai pemegang amanah Institut Pembangunan Pendidikan Maju (MIED), kata sumber.

The Malaysian Insider difahamkan Palanivel, yang kini merupakan Menteri di Jabatan Perdana Menteri, memaklumkan lembaga pengarah yang bermesyuarat pagi ini — kira-kira empat jam sebelum mesyuarat agung tahunan (AGM) sayap pendidikan MIC itu.

Palanivel juga tidak hadir mesyuarat lembaga hari ini.

The Malaysian Insider juga difahamkan keputusan itu ada kaitan dengan implikasi politik di mana presiden MIC mahu menjauhkan diri daripada sebarang isu yang menyelubungi MIED pada masa depan.

“Beliau memaklumkan lembaga pemegang amanah pagi ini dan keputusan itu diterima,” kata seorang pemimpin parti yang menghadiri mesyuarat lembaga hari ini, yang dipengerusikan oleh Datuk Seri S. Samy Vellu — pengerusi MIED sejak ia diasaskan pada 1984.

Turut menolak tawaran dipilih semula ialah pemimpin veteran parti Tan Sri KS Nijrar, yang telah pun memaklumkan keputusannya kepada Samy Vellu dua minggu lalu.

“Tetapi keputusan Palanivel memang mengejutkan, ramai tak sangka,” kata sumber itu dan menambah, “ia juga satu tamparan ke atas kepimpinan Samy Vellu dalam MIED.”

AGM MIED hari ini sepatutnya memilih 10 orang pemegang amanah termasuk kedua-dua mereka. Ia akan bermula 2.30 petang ini.

AGM hari ini juga akan meluluskan usul yang mewajibkan lembaga pengarah mendapatkan kelulusan CWC jika mahu menambah keahlian dalam MIED.

Aspek itu menjadi isu awal tahun ini apabila Samy Vellu dilaporkan mahu menambah sebanyak 10 ahli dalam MIED, tetapi dibantah dan dipohon injunksi mahkamah.

Justeru, AGM hari ini agak menarik sebab kali pertama diadakan selepas Samy Vellu melepaskan kepimpinan MIC.

Samy Vellu, kini duta bertaraf menteri, secara langsung memegang jawatan pengerusi MIED sejak mengasaskan sayap itu tiga dekad lalu.

The Malaysian Insider
Hakcipta © 2011 The Malaysian Insider
Source: <http://www.themalaysianinsider.com/bahasa/article/presiden-mic-kejutkan-ramai-tolak-dipilih-semula-pemegang-amanah-mied/>